

續修四庫全書



《續修四庫全書》編纂委員會編

續修四庫全書

上海古籍出版社

六四七・史部・地理類

〔光緒〕吉林通志一百二十二卷圖一卷（卷一至卷五十五）

〔清〕長順等修 李桂林 顧雲纂……………一

2442/107

〔光緒〕吉林通志

〔清〕

長順等修
李桂林纂
顧雲

據清光緒十七年刻本
影印原書版框高二〇
一毫米寬三〇八毫米

臣長順跪

奏爲勸修吉林通志恭摺奏

聞仰祈

聖鑒事竊臣聞志記也積記其事也書序曰九州之志謂之九邱邱聚也言九州所有土地所生風氣所宜皆聚此書也是後世方志之書所由昉也吉林極幽營之東北控遼瀋之上游襟帶江山表裏華甸土苞上壤地跨勝形信神明之奧區寔守國之利器漢唐以前羈縻勿絕迨遼金元明爲州爲部爲路爲衛分土受治漸啟規模洪維我

國家肇啟大東衍源長白考諸鴻烈是爲報德之維溯自

龍興實始發祥之地高山

天作豐水

謀詒

太祖

太宗威揚撻伐式昭七德

垂裕萬年

世祖克成厥勳奄壹區宇

列聖觀光揚烈丕顯丕丞

歷念舊邦聿隆

作述欽惟

皇帝陛下續承統緒

寅紹丕基緬懷

締造之惟艱深維本根之至計

特允前將軍銘安之請添置官吏墾闢荒萊

開澤宏敷隆規大起而且整軍經武設戍已之屯防招民實邊增庚戌之土斷形東壤制視內地無少殊其疆域則視內省爲尤重允宜編諸方策垂示無窮而三百年來省志未立無以恢宏

神謨淵召鴻業是亦守土之臣之責也且夫王者陶天下爲

一家必先物土宜而制疆里外史掌四方之志將以申封守而畫郊圻是以河圖括地遁甲開山伯益山海之經周官職方之紀洎夫歷代並有專書顧華渚丹陵未顯孕靈之跡幽居邵室僅傳胥宇之文仰松柏於殷山景毫則圖經莫考指枌榆於炎社沛豐則紀述無聞唐家仙李蟠根徒問十道之志宋氏商邱奠號空稱九域之書樂史實宇不列典章殷陽輿地但箋沿革徧稽往籍罕徵省山與宅之規茲遇紹聞敢忘

建邦啟土之烈臣職司守土歷有歲年輒欲與此邦人士網

羅舊聞敬謹綴輯然而吉林之志較之他省有倍難

者夫索綬春秋端資邊瀾常璩國志半襲譙周是則

一方之書不能不藉於一方之紀而吉林則自來紀載未有專書漢史三韓之說既范氏之誣辭渤海大氏之文僅唐書之旁及書缺有閒不足據依惟乾隆四十四年

欽定盛京通志之書詳記吉林建置之事今擬恪遵

成式推廣新編而百餘年來之經制典章增華踵事亦應旁搜博采州次部居庶幾考獻徵文不虞散落特是創

三

青繕寫尙需日時而起例發凡宜先裁定伏以

聖皇啟宇

王迹肇基

開闢之神謨

征伐之偉烈在原有幟經

陟降而地靈成聚成都版圖於日闕爰在

聖祖則翠華三莅念切紹庭泊乎

高宗則鑾輅四臨功期繩

武頻昭

曠典富有

天章是皆宜恭紀

聖謨登諸首簡若夫星土井疆之縷載山川城郭之條分古

今沿革郡邑置省戶田賦役郵驛兵防長佐師儒之

官論秀書升之典薛季宣之編土俗范成大之記虞

衡人物志之助林紘藝文志之依班固凡此門分戶

別總期綱舉目張是宜精摭密摭顯著臚晰者也至

於分率準望別成裴秀之圖斜上旁行更著史遷之

表庶幾言其域分條其風俗疆宇之故視之而可知

若坐堂陞俯視庭宇形勢所憑察之而足審將下以

爲方來之法守而上以備

四

國史之要刪焉臣治戎是職守邊無效有愧伏波之聚

米開示衆軍竊慕鄧侯之收書能知隘塞用竭愚管

閑局興修他日書成恭繕進

御所冀述艱難之

先業如陳二南七月之詩尤願追揆舊之

威稜以成克詰方行之盛所有勦修吉林通志緣由是否有

當謹繕摺具

奏伏乞

皇上聖鑒謹

奏於光緒十七年九月初三日具

奏十月初四日奉到

硃批知道了欽此

五

吉林通志序

竊臣嘗恭讀

高宗純皇帝御題盛京吉林黑龍江標注

戰蹟輿圖詩仰見

太祖

太宗威弧親御及

命將出師凡東三省

天戈所指之地一百四十有四而吉林則居其十七雖

聖武布昭猶不啻百戰而後得之蓋經營是地若此其勤也

迨順治建元統一區宇歷今二百五十二年而吉林

奏表

皇迹肇基實在明之中葉戊子歲蘇完部來朝辛卯歲收服

長白山之鴨綠江部厥後扈倫四部次第削平

威稜所憚覃及東海亦皆在甲申以前五六十年的間舉海

內之地之隸於職方者莫先於吉林蓋沐浴

醴化又若是其久也今天下郡縣皆有志吉林獨無專書其

事迹大凡僅附見於

盛京通志之內而乾隆以後維歷年因時制宜政多因

革壤地之有離合人民之有耗登秩官之有增裁名

號之有升降以今準昔未易殫言無以志之將何所

考且使

列祖勅垂之艱難與夫此邦之人被

化之悠久不悉著乎簡冊而昭示於來許非所以彰

盛烈而盡臣職也獨是修志之難尙矣而於吉林則尤難方

志之書首重沿革乾隆中

敕修熱河志及

皇輿西域圖志皆爲勅舉其沿革僅始自秦漢以來吉林

則肇自唐虞事追隆古較西北之開闢獨前千數百

年拙莫勿吉之殊稱肅慎女眞之異號別爲七部判

爲五京夫餘界接於撻靼黑水中分於桐地部族之

數旣已糾紛而大嶺以東七縣隸於都尉粟末以北

奏表

工

三州置於渤海郡縣之制權輿斯託必盡明昔時四

至八到之分始能定今日星羅棋布之勢此沿革之

難志者一也鄭樵云疆域有時而更山川千古不易

山川者疆域所由分也吉林之山則長白峙其東南

縣互千餘里三江發於長白其源流或千餘里或五

六千里自來史志荒略殊多如蓋馬之號明志誤認

於遼東黑龍之名金史謬施於宋瓦是由年禪縣長

道路悠遠傳聞不免失真兼之文字互殊聲音頗異

記載尤不能無誤今欲例證再賁兼參經緯注之規

體列方言備譯史舌人之掌誥非尋山脈水訪遺搜

渠何以得其主名信今傳後此山川之難志者二也

天生五材民並用之廢一不可誰能去兵所以有文

事必有武備也吉林勁旅天下稱最自前世有三人

渤海當一虎之譚女眞兵滿萬則不可敵之語

國初設昂邦章京後乃改爲將軍以統轄之而分隸於

各副都統者則有八旗駐防之兵三十年來變通舊

制倍餉而抽練之爲將軍所自將者則有吉勝驍勇

營之兵分防於甯姓琿沿邊之地統之以將軍而分

屬於叅辦大臣者則有靖邊營之兵其專屬於東三

省練兵大臣而分駐於吉林之地者則有吉字營之

奏表

三

兵兵之名凡四而府廳州縣之捕盜營兵猶不與焉

其增裁合併之數頗難覲縷又中俄分界定自康熙

其時吉林北界極於外興安嶺厥後改定非一今昔

大殊形勢屢遷控制彌要疆場之事實繫邊防所宜

備列始終以垂永鑒若不及今甄錄將恐散落難稽

此武備之難志者三也在昔漢祖從龍多由豐沛光

武佐命半出南陽然盛極一時而不間斷起吉林風

厚土博長白混同之雄秀浩瀚旣已

發祥篤慶而又分其餘氣毓爲英賢爰自

開國建勲

中興戡亂則亦有熊羆之士不二心之臣生於其間應期作

輔歷三百餘年之久接踵繼起用之不窮迥非兩漢

一時之盛所可倫比然自

國史以外他無所徵雖考信不誣而取材實隘至若金

源勲業英傑挺生佐命之才屏藩之彥亦惟上京府

路所得爲多而金史之餘更無旁證此人物之難志

者四也凡此皆地志之通裁而於吉林爲勦例既無

徵於文獻固極費於搜羅加以食貨之數經政之常

學校之規模與夫古今職官之同異雖皆整齊故事

排比舊文要其去取之間亦貴具有微旨不敢蹈歐

奏表

陽修刊落事實之失仍斬免羅鄂州抄取計簿之譏

別識心裁蓋有志焉而未之逮也臣自光緒十七年

九月奏奉

俞旨開局興修自惟謝陋之才兼有簿書之冗以爲草率

不足以塞責獨斷不足以集事用是集思廣益博訪

通才載筆基嚴操觚特俱發凡起例規撫悉本於前

修別類分門採摭務求其可據首登

聖訓如尙書之冠典謨次列

天章等益稷之存喜起則考

建邦之烈紀爲大事之篇而前代遺文附從甄錄凡以記言

記事綱領全編者也由是考四千年之沿革挈領提

綱綜五千里之方輿辨方正位食貨所以利用經制

所以諸民學校敷文兵防奮武職秩重官師之守人

才徵鍾毓之靈金石遺文亦加甄錄總期詳盡以備

參稽至於徵材所餘事多叢瑣棄之則意有所悵有

之則義有所妨別爲志餘綴諸末簡凡十三目統以

志名子目四十有一爲卷百二十有二共三千六百

八十九葉總百有餘萬言歲月幾更編摩粗畢敢謂

部居而州次庶幾綱舉而目張雖采備輶軒未足入

西山之秘而光分冊府尙希塵

奏表

乙夜之觀伏願

皇上本觀

光揚

烈之忱溯

基命造邦之統覽川原之體勢則高山思

天作之勤攬郡邑之殷闡則與宅懷

帝臨之赫緬作邑築城之詠懷

締造而思艱追降原陟嶽之勞念

詒謀而繼

武庶翼得召公而闡國盡復迺疆迺理之規

五

陟禹迹而方行上符

丕顯

丕承之烈是則臣區區編輯是書之微意云爾

臣長順謹序

奏表

六

吉林通志凡例

吉林烏拉四字連文

國語吉林謂沿烏拉謂江其曰吉林者從漢文而省也

紀述吉林之書不見於前史明一統志所載十未舉

其二三

國朝乾隆元年奉天府府丞王河纂

盛京通志四十八年又

敕撰盛京通志始合東三省事而并記之然皆以

盛京為主吉林及黑龍江特從附載故彼詳此略亦其

勢然也四十二年曾

凡例

敕撰滿洲源流考專記地理體殊方志道光四年吉林將軍

衙門堂主事薩迎阿撰吉林外紀僅鈔錄通志兼及

吏牘體例龐雜文不雅訓考證尤疏難可依據蓋吉

林之隸職方三百一十餘年今之專志實為勦舉謹

依

欽定盛京通志成式酌加損益以適事宜凡十三目統名以

志不立雜名曰

聖訓曰

天章曰大事曰沿革皆無子目曰輿地曰食貨曰經制曰學

校曰武備曰職官曰人物曰金石曰志餘每一門中

各分子目條舉件繫以簡御繁凡爲卷一百二十有

二表散歸各卷圖附於後別爲敘例如左

史以記事兼以記言惟志亦然吉林爲

龍興舊土三百餘年以來

文謨

武烈

神

聖繼承邦制顯庸絲綸丕煥謹編歷奉

詔諭及

皇上訓辭弁冕全書遵

凡例

盛京通志例也凡五卷

帝庸作歌載於益稷是則記言之史兼及篇章有明徵矣

列聖廑念舊邦發爲歌詠

欽明文思謨典同垂匪第一方考鏡之資實立萬世訓行之

準謹稽

御集恭錄

天章亦

盛京通志例也總一百十篇共爲一卷

謝啟昆謂後世輿地之記雖名爲志然於一方古今

〔光緒〕吉林通志 凡例

大事反缺略不載蓋猶囿於圖經之舊不能充類以

盡義也顧其所爲廣西通志止紀前代獨缺

本朝蓋以分見各門勢難複見故也吉林則朱果

發祥

肇基皇迹

列聖戡定撫綏之偉績與夫各部落歸附之後先大抵皆在

甲申以前不爲專紀之篇不足以昭示

耿光大烈用是仿魏源

開國龍興記及何秋濤

聖武述略之意自長白衍祥以至用兵羅刹撮其大事用志

凡例

豐功其前代故事則仿臨安志紀事金陵新志通紀之例附

甄於後俾四千年之事蹟若網在綱蓋沿革之權輿

亦全書之綱領也凡三卷

戴震曰地志沿革不明則山川人物無一不誤誠篇

論也

國家建邦啟土出震乘乾

勦業始基實維茲地其古今沿革自宜詳臚始末昭信社詵

惟自唐虞迄今國部府路衛所之名屢經更易分合

同異最爲糾紛今故大書專門用昭所重冠表於前

以著相承之緒而詳稽史傳博考羣書以明表中稱

引所據分目提綱各加案語務使源流分合指掌瞭然至於引書必著出典徵實而少空文斷以塞附會影響之談且以杜剽竊摺摺之習此全書之通例謹於此發其凡焉凡三卷

地理爲史志之一體而方志爲地理之專書故紀述當以地理爲本今立輿地一門爲子目九首曰天度志地之書例載天文分野其說本於周官保章氏而漢書地理志因之然分星惟隸九州而不及九州以外如析木爲燕分而并以元菟樂浪屬之是謂以其所及推其所未及已覺迂遠而不足憑況元菟東北

凡例

四

數千里之地又豈析木一次所能盡耶今遵

欽定熱河志例刪除分野之說惟以北極高度京東偏度著於篇而日出日入早晚及節氣時刻分秒皆按度里表而出之次日曰疆域元和郡縣志太平寰宇記皆詳記四至八到元豐九域志每縣下於距京距府旁郡交錯四至八到之數縷晰尤詳辨方經野於義應爾古史方隅具詳沿革故此門惟以今域爲據村鎮附見從臨安志例烏蘇里江以東際海之地富克錦東北海以外地皆詳記之是程大昌作雍錄樂史寰宇記列幽媯營檀十六州之意也次日山川曰水道則

樵云郡縣有時而更山川千古不易故禹貢以山川定疆界吉林之山古有不咸蓋馬水有粟末鴨綠其名號垂數千年以今地望診之班班可考鄭氏之說信不誣矣茲詳臚今古正位辨方分隸各城具詳里數庶有舛誤猶可考焉別爲水道備紀源流以水爲經卽以水所歷之山谷城邑爲緯純用桑經鄭注之例亦鄭氏所謂地理以水爲主之義也松花圖門鴨綠三江以爲之綱衆水爲目衆水又受衆小水以入江者別爲目中之綱而吉林全境如指諸掌矣至於今昔殊名清漢異字則附爲語解以代舌人次日城

凡例

五

池吉林之城庫薄已甚池尤淺狹無當設險之義然有基無壞踵事可增金元故城所在多有類次於後亦考古者所必資也次日曰廨署設官以治民卽有官舍以居治民之官備志建置年月與其處所俾居此者不以傳舍視亦吳郡志記官宇臨安志記官寺之例也次壇廟而祠祀寺觀並附焉吉林名山大川如長白山花禮隆命祀棲神壇宇皆當年奉

勅興修

國家有大典禮遣官祭告其他社稷壇壝及諸祠祀各有攸處今備志之蓋報功崇德將於此寄其誠也若

夫鄉聚叢祠浮屠老子之宮律以陸氏靈壽志之例
宜從屏汰然水旱之有禱祈災荒之有振濟有司每
借其地以爲公所則亦不可廢也次日風俗仿荆楚
歲時記岳陽風土記之例略綴於篇並附著赫哲賈
雅喀之俗使懷古者覽焉右皆麗於地者總爲輿地
志凡十五卷

班氏約取洪範八政裁爲食貨之篇後史相仍著爲
圭臬志乘家莫不因之今亦依類區分爲子目五首
曰戶口職方氏辨九州山澤之利並及男女生數是
戶口隸於食貨之例也賦出於地役出於民故戶口

之登先於田賦今上起

凡例

六

開國下統今茲備考官書旁稽案牘旗丁民戶詳列無遺次
日田賦吉林初制地以旗分猶有井田遺意官莊之
制亦存采地之遺歲月浸深典鬻時有又新舊荒熟
名目尤繁今爲備列初終條別綱目凡章奏文移有
關田賦一皆裁入本書亦班氏序次是錯貴粟之奏
入食貨志之例也雙城開墾尤旗人百世之利其所
規畫問裁入宦績傳中則趙充國傳載屯田諸奏之
例也期爲後法無憚詳陳次日蠲緩
國家軫念舊邦偶遇偏災卽行蠲振謹與田賦爲類逐

年記之以志

殊恩次日物產禹貢九州備列土物吉林土膏沃衍百產
豐盈冊報僅列空名不爲紀實舊志寥寥數語考證
尤疏今略仿南方草木狀之例稱名辨物別性類情
無取泛濫亦不敢失之荒陋總期有關斯土不泛作
草木蟲魚疏也次日貢賦元豐九域志每州軍下備
載貢賦之額數足資考證蓋禹貢之遺意存焉吉林
東珠人獲貂皮歲貢

天府及他貢品凡皆祭祀所需蓋

聖人盡物盡志之義於斯見焉僅附物產不足以考規制

凡例

七

謹稽會典通考及各城檔冊錄其品物列爲專門總
爲食貨志凡八卷

經制之政仿於六典廣西志目曰經政順天志目曰
經制其義一也今依例纂輯爲子目七首曰禮儀伏
讀

大清會典通禮通典諸書皆官禮之精王政之要所以
廣教化美風俗也特卷帙繁重不能家置一編賴志
乘可稽藉資法守謝啟昆訓率土通行非一方所獨
有因廢而不載非通論也今約舉慶賀開讀宣講迎
春耕藉釋菜鄉飲賓興諸大典具著於篇庶使官紳

士庶不至惜於施用史通所譏重加編勒祇覺煩費之云不敢避也次日祿餉吉林經費以養兵爲大宗官俸武多於文亦皆爲養兵而設光緒改制廳縣始增皆以本地之財供本地之用開墾大租所入略足相敷而新增之兵及三省防軍猶資部撥備開墾大加充擴則司農可省度支其爲利益實非淺鮮今備列支銷核之入款贏不足之數可以一望而知則所以裕經費而籌經久者將於是有所焉次日倉儲吉林地廣穀賤民鮮蓋藏樂歲粒米狼戾不知畜積凶年則仰給振濟別無良法若遇積潦在地轉運維艱

凡例

九

雖鄰境豐收不能相救倉儲所宜亟講也會典所載猶有可稽往制開先善規防後是在今日矣次日錢法三代之世用錢至少秦漢以後浸多吉林自金天會時黃龍府肇州立錢帛司見於史者實始於此然其地皆在今省城以西至其東則

國初猶以銀布交易古意存焉咸豐初用鈔法厥後民間私用票光緒十年欲仿制錢以鑄銀錢亦不果行其開鑄鑄今之制錢則自十三年始行之未久滋弊已深備列始終亦一方盈虛之所由見也次礦廠天地自然之利當與天下共之不當以無用棄之吉林

五金之產甲於滇粵煤礦之旺尤利民生若經理得宜歲入自倍今以已開者分條詳記章奏附之案牘所關亦並甄錄所冀逐漸推廣此爲有開必先耳次日商務則朝鮮交易之章程次日徵權則吉林土稅之規制並詳稽冊籍條別科分整齊其辭不敢刊削其迹也從順天志例總隸之經制凡八卷

古者先師無廟但立學校因事而釋奠焉後世州縣建孔子廟因設爲學制雖異古而用意同也吉林之地自渤海金源皆嘗立學

國朝乾隆元年建文廟於永吉州蓋州縣之制實始於

凡例

九

此今作學校志其子目五首日祀典歷代褒崇之禮從祀之儒並行恭紀從陶澍安徽通志例也次日學宮凡典禮位次牲幣器數樂章舞譜之屬詳稽會典悉綴於篇俾學者入廟思敬以時習禮亦陳宏謀湖南通志例也次日學署則廨署之分門次日選舉取王制選士俊士造士進士皆出於學之意隸之此門蓋以吉林科舉向附奉天人數寥寥不能專紀故也次日書院而鄉學義學社學學田並附焉總爲學校志凡六卷

自古有文事必有武備所以示威校以遏姦軌於未

萌也我

朝以武功開國

太祖高皇帝以十三甲廢堦王迹用兵實始於吉林今志武備爲子目四首曰兵制以著駐防之所自防若練軍若靖邊軍若吉字營練軍皆三十年來所增設雖出權宜已成永制稽其尺籍並綴於篇次曰分界皆康熙至光緒以來中外定約之事邊防所繫宜隸此門傳所謂疆場之事慎守其一而備其不虞者也次曰驛站次曰船艦皆兵屬也並類及之總爲武備志凡七卷

凡例

十

漢書百官公卿表首詳官制次譜官名史氏前規實志乘成式唐人應璧記凡職官姓名占籍任年雖丞尉必書所以備掌故也今兼斯二例用志職官漢唐以來應得而詳者從略其可詳者託始於遼渤海金源並營建國其公卿以下統治一國者自爲京朝之官不當繫於一省惟守土之吏乃著於斯略以職分依年列表

本朝則以將軍統之文自巡道以下武自副都統以下依其品位具列於篇學政入表自莅吉之年始以使臣之體冠於巡道之上通例然也宣續有可考者附

〔光緒〕吉林通志 凡例

傳於後吉林所隸見魏晉間者若毋邱儉慕容廆訖唐李靖薛仁貴輩咸以征討至侈而志焉正如吳人祀范蠡爲有識所嗤至何龔遣復扶餘則有功矣然所遣賈沈他事無徵龔初未至其地故斷自遼耶律倍始遼一代渤海之地皆屬東平今遼陽惟倍始封實臨輝罕今南古塔地後來者未便牽連得書也倍亦以征討至而當撫治其地有愛民之心託始於斯於義差允金源一代官斯土者半皆地著大抵已見人物志茲不復具以避複重元明兩代無可考見

本朝則取之官書備詳仕履俾閱者有以考其始末焉

凡例

十一

總爲職官志凡十四卷

修一方之志而爲人物作傳論載自應詳備以補正史所遺吉林人物則惟正史是資實鮮旁證唐以前無可考兩唐書蕃將傳多有云其先隸羯人者辟之瑛邪隴西但標郡望核以限斷之義闕入非宜考之有徵故應自李謹行始以下皆以代次不復分門金源一代甄錄頗多而帝后不載明志不可僭史也其纂輯之法則皆依據史傳兼以表志互參集句成志篇不增一字人名地名依乾隆

敕改本仍注原作某字於下方間采續通志契丹大金國及

宏簡錄等以證異同其有他書什一而已至於

本朝彌復矜慎別於前代略分四門

開國功臣隸吉林者十六七不容以一鄉善士班也則首之以勲績大抵本滿洲名臣傳八旗通志八旗滿洲氏族通譜

國史臣工列傳參之他載籍淘汰而疏通之不悉下注以省繁複視他門爲詳視他志爲粗紀盛且補拾闕遺也起天命者傳三世天聰崇德及順治以次降焉既隸京旗卽同土斷其實籍於此非以長白標地望者不在此例附以世職功授者入焉附以忠義死事

凡例

三

者入焉表分輕重都尉騎都尉雲騎尉各以年次有城可分者夾注其下事實無考名氏僅存則以無徵故亦陳壽志季漢輔臣常璩志華陽士女例也據一統志扈倫四部吉林全有其三惟哈達舊城屬奉天新城乃屬吉林傳中有云世居哈達者如索尼等傳既未能知其定居何城則亦過而存之庶幾無虞漏略云爾若夫言坊行表種學績文與夫以孝弟稱於宗族鄉黨者統曰耆舊又謫居僑寄均之無多不復如他志分門次之曰寓賢操觚所職凡有聞見無敢或遺若乃有而弗知而弗傳則固有任其責者矣次曰

列女若節婦烈婦貞女烈女各傳其實不繁爲部居劉向范蔚宗例也紀載蔑聞寥寥以此總爲人物志凡四十七卷

吉金樂石考古所資也志乘甄采僅最其凡或傳錄文字非由目驗沿訛襲謬不可勝言吉林風氣初開搜羅未備然此僅見之十餘種自裴室碑外皆拓本見存證以史文足資參校得之非易懼復墜湮具錄全文附以考證雖寥寥數葉亦立專門所冀他日補編有所附麗云爾

凡例

三

紀事者必提其要纂言者必鉤其元書成得事與言之無可比屬者若干條措之則事或有遺載之又貫序無說今昉臨安志紀遺之例綴諸簡末如史家之小說子部之外篇焉人地事物以類相從略爲區分未極賅備補苴罅漏以俟將來名曰志餘凡成二卷譬之餘分閭位宜殿全編者也